


O LE SULU SAMOA



O LE LUPE AVE FEAU I MASINA TAITASI

A LE

***EKALESIA FAAPOTOPOTOGA KERISIANO  
I SAMOA***

NA AMATA LELE MAI I LE 1839

E OO MAI NEI I LE

SULU O OKETOPA 2000



## FAASINO UPU

OLE LAUGA	2	-	3
ARETO MO I E FANAU	3	-	4
AUFAILAUGA MO LE SULU SAMOA O LE 2001	5		
MISIONARE MO ZAMBIA, AFERIKA	6		
SAILI I LE NUU MONI	7	-	8
OLE LOTU I SAANAPU	9	-	13
OLE MANA O LE ALOFA	13	-	14
OLE MALIU	15		
FALETUSI MA LE FALELOMITUSI.	16		



# LAUGA



*Tusi Faitau: Iopu 1:20*

*“Ona tula’i ai lea o Iopu, ma saei lona ofu,  
ma tafī lona ulu, ua faapa’u foi o ia i le eleele.”*

*Manatu: Tau’ave faatasi o tatou mafatiaga.*

Ua seu falemua mo le seu falevaai a le Ekalesia i lenei masina o Oketopa le manatu o le Tusi Faitau Aso: Tau’ave faatasi o tatou mafatiaga.

Ua o se faasili malosi ma faamama avega le sao taua ma aoga o lea mafaufauga mai le tusi o Iopu, i le au faigaluega galulue i nuu ma aulotu, a o aloalo atu i o latou faiva faa Tala Lelei faapitoa o le masina; Lotu Tamaiti.

Leai se manatu e faatonu, ae na ona tatatuli ma fagufagu atu Matua i la outou matafaioi, ona o lo o i ai lava le manaomia e le au faigaluega faifeau, o la outou lagolago sua. O se mea lelei le tuu tele o a tatou mea alofa, ma tausoa faatasi se mamafa mo se mama, ma se faigofie foi o ni mafatiaga e agai i ai ni sauniuniga mo le Aso Sa Paepae o le Fanau o lenei tausaga.

Mata felefele tala ua molita’i atu e le au momoli tala ia Iopu, i se mala paga ua o’o i ona tamaoiga, e oo a i tama a lona manava, o ana fanau. Ua falute uma atu sao tiga ma faaonoono loto o ia tala i le mafaufau o Iopu. Mata ua galulu ai Iopu, ma pei ai ua se lona moa.

Peitai, o se uiga manaia ma le faasoisoī ola lelei i le au Kerisiano le manatu ia Iopu, ona e peiseai o le ‘Auauna Puapuagatia’ o taua e Isaia: O le tagata inosia, ua tuulafoaiina, a ua masani ma le tiga. Aua ua seu falemua i lana seu falevaai, e fai ma faataitaiga sili i gafa ma faia o le Tala Lelei, tainane totino ma maaveave o le au

faatuatua: Le onosai, ma le taofiofi latalata ma soosoo tauau le faatuatua ma le faamaoni i le Atua, i totonu o le atapaia ma le aati o ni mala paga. Ao se aotelega e faalupe ai le tagata o Iopu, le tagata ua moamoa i puapuaga: Loto maulalo. Ua mamau taofiofi ai ia te ia le faapalepale ma le lototele e tali tiga. Ua maualafia ai ona faaee atu ia te ia pāpā o le malualii faale Atua, ma ua avatu foi i ai sa tatou faamalo.

Ua taitai e Iopu o ia, e le pei o se tagata ua lolo i fatia ua malofie ai, a ua pei o se tagata tau lelei a Keriso e poto ma atamai i totonu o puapuaga. Ua taumafai e tolotole ese seia lava tu ae i luga: Ua saei lona ofu, ma sele mama lona ulu, ma toe faapau ifo i le eleele e ifo ma tapuai atu i le Atua i lagona faamaulalo, seia faagaganaina e tautala: Na ou sau le lavalava mai le manava o lou tina, o le a ou foi atu i ai ua le lavalava; na foaiina mai e le Alii, ua aveeseina foi e le Alii; ia faamanuina le suafa o le Alii.

Peiseai o faaaliga ia o le matau, faaloalo, ma le alo ese i le leaga o le agasala: Faameo atu i le Atua. A ua manatu Iopu, mo lana tapuaiga: O ona luga ae o aoao agalelei o le Alii o faamalu ia te ia; a o lalo ifo ua nofo faamaulalo ai, ma fatufatu ai se mafaufauga filemu ma le toamalie, ina ia le fai mona aleu le le manatu i totino matagofie tau lona agaga.

Sema e, ua le mala ese le gasegase o Iopu, mala ese se gasegase o faatafa ai le Ekalesia. Talitonu le taofi, o le gasegase o Iopu, o le faatafa lava lea o le Ekalesia. O fea a e agai mai ai se tala faaoso misi alofa i se manuaga o saia ai le maaveave o le Ekalesia, pei ona manualia ai Iopu, e logo a tino tiga o le alofa i ona itutino. 'Aua le fiti a ia o le papau se loto tiga, ma vave aina le mafau fau i se faagau le malie, ma tagaloa tusitusi ai se leaga ia te ai ma ai. A o se manuaga ia maualafia ai le onosai, ma aloalo ane ai e sapai tali, ma tauave faatasi se mafatiaga o supa ai se itutino,

ma lailai ai foi se gafa ma faia tau le Ekalesia a Iesu Keriso.

Ia tatou manatu i le Ekalesia a Keriso o se auauna puapuagatia, ia pii ama uma i ai, ma sii faatasi ae lona tino ina ia le vasai lona faamoemoe lelei; Fofu manua faaola totoga, ma faafoe le filemu ma le loto maulalo.

I le ma le tasi, le Ekalesia: Faiva o le Ekalesia e sema i ai se toomaga o se sulufai, aua o le faletele e tua i ai faleoo. O ona faiva foi o manaia e faafoe i le alofa moni ma le onosai, e laga ai le fiafia ma le malosi, tainane o le faatuatua ma le faamaoni e faamaite ai pea le soosoo tauau ma le Ao o le Ekalesia, Iesu Keriso, i le atapaia ma ni aati o le olaga. Ia mamau foi le mulumulu aufoe o le loto maulalo, e taoso ai le alofa moni o le tasi i le isi. E pei o Keriso na ia tuuina mai lona soifua paia na te tauaveina ai o tatou mafatiaga i sala o le agasala, tainane o le faafanoga o le tuugamau ma le oti. Amene.

*I. Tupuola, Jr  
Leauvaa.*

## **ARETO MO LE FANAU**

**O USO LOTO LEAGA O IOSEFA:  
(Faitau: Kenese 37:1-36)**

Ina ua taunuu atu Iakopo ma lona aiga i Kanana, e le i leva ae maua loa lona lua o tama a Rasela o Peniamina lona igoa. O lea la ua toa sefulu ma le lua nei o atalii o Iakopo. O le toasefulu o i latou o le fanau a Lea, a o le toalua o i latou o le fanau lea a Rasela. O aso ia ua matutua lava le fanau a Lea. Ao Iosefa le tama matua a Rasela, ua sefulu ma le fitu nei ona tausaga.

E le i leva lava ona fanau mai o Peniamina le uii ona maliu loa lea o Rasela.

O ia aso, o lo o sili lava le alofa o Iakopo ia Iosefa i lo isi uma o lana fanau atoa. O Iosefa o se tama lelei lava ma le atamai e pei o lona tama. Ina ua tuuina atu e Iakopo se ofa manaia faapitoa tele ia Iosefa, ona loto leaga loa lea ia Iosefa o isi ona uso uma. Sa le fiafia foi i latou uma ia Iosefa; aua sa fai foi ana miti, e i ai se aso e ifo uma ai ia te ia lona aiga atoa. Na manatu uso matutua ua tusa ua manatu Iosefa e sili o ia ia i latou uma.

O se tasi aso, na manao ai Iakopo e ave se feau i ona atalii. E tusa e lima sefulu maila o lo o leoleo mamoe ai i latou i le tausiga o le lafu mamoe. O lea, na ia auina ai Iosefa i lea mea mamao ma lea feau.

Ina ua iloa mai e ona uso matutua o Iosefa ua alu atu, na fai ane loa se tasi o i latou, ia latou fasiotia loa ia te ia. Ona tatou tau atu lea ua aina o ia e se manu feai. E leai se isi na te iloa ina mai le mea moni, aua e mamao tele lenei mea o lo o tatou i ai nei.”

O se tasi o ia uso, o Reupena, e le manao o ia e fasioti ia Iosefa. Peitai, sa fefe o ia i ona uso. O lea na fai atu ai lana fautuaga, “Tatou lafoina o ia i totonu o lona lua maualalo. E oti ai o ia i lona mea”. O le fuafuaga a Reupena, ina ia lafo o ia i le lua, ina ia sau o ia i ai pe a maua sona avanoa e toe laveai ia te ia.

I le, ua pueina loa Iosefa e ona uso, ua lafo ia te ia i le lua. Ua uma lea mea, ona o ane ai lea ua aai, a o le taimi lona ua tau fono mai ai Iosefa mo se fesoasoani mo ia. Na ootia tele le loto o Reupena i lea tulaga, ma ua alu mamao ese o ia ina ia le lagona e ia le faataio mai a Iosefa.

O le taimi lea na alu ese ai Reupena, o le taimi foi lea na ui ane ai nisi tagta faatau oloa e agai i Aikupito. O lea, na maua ai e Iuta, o se tasi o uso o Iosefa, sona manatu e faapea, “Aisea tatou te le faatauina atu ai Iosefa i ia alii fai oloa e fai ma a latou pologa? A faapea ona le oo lea ona fasiotia o ia, a o le a alu ese mamao ai o ia ma i latou.” O le mea lea na latou toe sisiina ae ai loa lea o Iosefa ma faatau atu i ia alii fai oloa i tupe siliva e lua sefulu.

E le i toe mafaia e Reupena se mea ina ua toe foi ane o ia ua leai se Iosefa. A o le i toe foi i latou i lo latou aiga, na latou fasipeina se oti ma fufui i ai le ofu manaia faapitoa o Iosefa. I le ua latou avatu le ofu o Iosefa ma faaali atu i lona tama ma ua latou fai atu i ai, na latou maua le ofu i le togavao.

Na matua nutimomoia le loto o Iakopo. Na lagona lava e ia e pei ona fuafuaina e ona atalii, ua aina lona atalii e sili ona pele ia te ia e se manu feai aivao. E leai lava se upu a le isi vaega o le fanau na toafilemu ai le loto o Iakopo. Na le mafai e i latou ona tau atu ia te ia o Iosefa ua fai nei ma pologa i Aikupito. O le mea, lea, ua na o le tagi pea ma saga tagi pea le mea ua fai nei e Iakopo.

#### MAFAUFAU ATILI:

Na loto leaga tele uso o Iosefa ia te ia. Atonu e i ai se ala tataua na mafua ai. Afai e leaga lou loto i isi, e te mafaia ai iina ona fai mea leaga ma fai upu leaga ia i latou. E faapefea ona mafai ona faateaeseina lou loto leaga?

**F.S.S.**



## AU FAILAUGA O LE SULU SAMOA 2001

<u>MASINA</u>	<u>SUAFA</u>	<u>NUU</u>	<u>MATAGALUEGA</u>
Ianuari	Isaia P. Tiatia FT	Lalomanu	Falealili i Sasa'e
Fepuari	Tanielu Taavale FS	Safotu	Itu-o-tane
Mati	Amosa Amosa FS	Dandenong	Ausetalia
Aperila	Lauina Vui FT	Leusoalii	Apia i Sasa'e
Me	Tunumoso Soliola FS	Sapo'e	Falealili i Sisifo
Iuni	Maligi Evile FS	Kingsland	Aukilani i Matu
Iulai	Esaroma Fatilua FS	Matautu-tai Lefaga	Aana
Aokuso	Vaialia F. Vaialia FS	Utualii	Malua
Setema	Tumama Vili FS	Christchurch	Niu Sila i Saute
Oketopa	Mose Tanielu FS	Papa-Puleia	Faasaleleaga
Novema	Tavita Anesone FS	Alafua	Apia i Sisifo
Tesema	Fereti Laufile	Las Vegas	Amerika

Faamolemole le Au Failauga e moomia le vave faaoo mai o lau lauga i le Ofisa o le Failautusi Aoa o le toe lua vaiaso ao lumanai ai lou masina.

Ia manuia le laugaina o le Upu.

Faafetai

*Komiti o le Sulu Samoa*

## **MISIONARES MO ZAMBIA,** **AFERIKA**

O le susuga a Uikilifi Vaifale ma le faletua o Sherry, faapea Fereti Tutuila ma le faletua o Sosefina, o faifeau Samoa ia ua tuua nei le atunuu mo le galuega faa-misionare i Zambia, i le konetineta o Aferika. O Uikilifi & Sherry Vaifale ma le fanau e toafa, na iu mai le Kolisi i Malua i le tausaga e 1998. Ao Fereti & Sosefina Tutuila ma le fanau e toafa foi, na faaiuina o la aso i Malua i le tausaga e 1999.

O le uluai aso o le masina nei, Aso 01 o Setema, na faia ai se sauniga faapitoa i le Fale Iupeli i Malua, e faauuina ai Uikilifi Vaifale ma Fereti Tutuila ma o la faletua e fai ma Faifeau Samoa (FS). Na avea foi lenei sauniga e fai ma tauluga o le mafutaga faafouina a faifeau sa faia i Malua i le vaiaso atoa (Aokuso 28-Setema 01).

O aso lagilelei ma le matagofie le aso o le faauuga. Ae o se sauniga foi na faagaetia ai loto ona o lona mamalu ma ona faalogoga loloto. Na auai i lenei sauniga le Afioga i le Taitaifono ma ofisa o le Fonotele, sui o le Komiti Faatonu, o Toeaina ma le aufaigaluega faifeau sa i le mafutaga faafouina atoa foi ma faletua, Pule ma faiaoga o le Kolisi i Malua, o matua ma aiga faapea uo ma paaga a misionare ma o la faletua.

O le taitaifono o le Komiti o le Au Toeaina, susuga a Faigame Tagoilelagi FT, na taitai i le sauniga o le faauuga, atoa foi ma le sakarameta o le faamanatuga na faai ai le tapuaiga. O le Tusi Paia na faitauina e Isaia P. Tiatia FT, o Tavita Roma FT na faia le tatalo o le faauuga, ao le lauga na saunia lava e le Taitai o le sauniga. O i latou na faaeelima: Faigame Tagoilelagi FT, Isaia P. Tiatia FT, Esekielu S. Tanielu FT ma Poasa Poasa FT. O le failautusi o le Komiti a le Au

Toeaina, susuga Apelu Lelevaga FT na ia tolaulauina suafa atoa ma oototoga o soifuaga o le au faauu.

Ina ua maea le sauniga ma feofofoaiga o alofaaga ma moomooga lelei mo misionare faauuina, ona faasee ane lea o le mamalu na alofai ai lea aso i le fale Senetenari mo se faaafe na saunia e le kamupani a le Polenisia. O le susuga ia Lale Ieremia FS na fai ma sui o le Mafutaga Faafouina ma le ofisa e faafetaia le Alii Pule ma le kamupani e tusa ma le faaloalo. Ao Uikilifi Vaifale FS na fai ma sui o le au faauu e faafetaia le mamalu o le aufaigaluega Toeaina, Faifeau ma Faletua o e na auai e molimauna lea aso taua.

O le 9.00 am i le taeao o le Alo Lua, 05 Setema, na tuua ai e Uikilifi & Sherry Vaifale ma o la alo e toatolu (3) faapea foi Fereti & Sosefina Tutuila ma o la alo e toafa (4) Samoa mo le galuega faamisionare i Zambia. E ui agai i Aukilani ma Sini ona tofafa ai lea iina. O le alii faifeau Periperiane o Mautofu Fuimaono o loo ia faatali maia le malaga i Ausetalia. O le aso 07 e toe tuuvaa ai i Johannesburg (Aferika), momoe ai i le po e tasi ona toe malaga ai lea i le taeao o le aso 09 i le taulaga o Lusaka i Zambia. E i ai le faamoemoe o le a feiloai a tatou misionare ma le United Church of Zambia mo se vaiaso sei tau faamasani ma le olaga o le atunuu, ona faatoa momoli ai lea o i latou i mea o le a galulue ai.

O Fereti Tutuila ma le aiga o le a galulue i totonu lava o le taulaga o Lusaka, ao Uikilifi ma Sherry o le a galulue i le nofoaga e tau o le Copper Belt, o se vaega o nuu o i tua o le taulaga.

Sei o tatou talosia nei alo o le Ekalesia; ia auomanu le faamoemoe i le faatasi mai o le Agaga o le Alii. Ia faalototeleina pea i latou ao aumau i atunuu ese; ma ia faapaiaina lo latou soifua aua le galuega talai o le Tala Lelei a le Atua.

*Dr. Paulo Korcia (Revd)*  
*Failautusi Aooo.*

## SAILI I LE NUU MONI

### PEPA MAFUTAGA MATAGALUEGA APIA SASAE 19-20 IULAI 2000

O Samoa o le atunuu tofi, ua vaevaeina i nuu ma alalafaga e oo i itumalo. Ua iloga ona mamalu ma ona paia. O Pule ma Tumua, Itua ma Alataua, Aiga i le Tai ma le Vaa o Fonoti, tainane Sua ma le Vaifanua, Fofu ma Itulagi, Sa'ole ma le Saleaumua ma le Launiu na Saelua. Samoa ua iloga i ana tu ma ana aganuu faaaloalo aemaise o le faa-Kerisiano. O Samoa foi ua pulea i le faamatai, o le tofi lea mai le Atua aua ua faavaeina ai, i le Atua. O le upu a le pese, "Ua tofia e le Atua o Samoa ina ia pulea e Matai." O Samoa, o lo tatou tofi lea, ma lo tatou nuu moni.

O le nuu moni, o tatou nuu i le lalolagi na soifua ma ola ai. E pei foi o lo tatou Alii o Iesu na soifua mai i lona nuu o Nasareta. Peitai e taofi nisi o le Tusi Paia o tatou nuu faale-lalolagi, e saunia ai tatou i le nuu moni i le lagi.

Ua fai mai nisi, "E le o so tatou nuu moni lalo nei, o luga lo tatou nuu moni". Fai mai nisi, "O i tatou o ni tagata aumau i le lalolagi, ae tatou te o uma lava i luga." Fai mai nisi, "O i tatou o ni tagata malaga, o loo amata iinei le faiga malaga, ae faaiu atu i le lagi i le mea o i ai lo tatou Tama i le nuu moni."

E faapea le upu a le alii o Tetuliane (Tertullian) "Ua ou mautinoa, o le lalolagi e tumu i mea tiga ao le lagi e mapu ai mai mea faigata."

Fai mai Kelemenis o Alesania (Clement of Alexandria) "E leai so tatou nuu i le lalolagi, o lo tatou nuu moni, o le lagi lea." E faapea se taofi, e i ai le fetalaiga a Iesu e lei faamauina i le Tusi Paia e faapea, "O le lalolagi o le auala laupapa, o le tagata poto na ona savali ai, ae le mafai ona faia ai sona fale." O le Kerisiano, e le

tumau i le lalolagi, o ia o le tagata e ola ma faia le finagalo o le Atua i le lalolagi ao lona iuga, e iu atu i le lagi i le manuia faavavau.

Ua le gata la ina fai mai nisi i lenei nuu moni, ae ua mafai foi e faipese ma fatupese ona faamatalaina i a latou fatuga ma faaupuga le matagofie ma le taunuuga manuia o lona nuu moni.

O le pese e 314 i le "Ina Pepese Ia" ua autu i le sini e faapea, "Le aiga uma i le lagi". O lenei pese na fatuina ma tusia e Uili L. Tomasi, ua mafai ona maua ai foi le ata manino o lona nuu moni. E faapea upu a le pese i le fuaiupu 1 & 2.

1. E! le lagi e, lou Tama o i ai,  
Le manuia lona  
E! le lagi e lou Tama o i ai,  
Lo'u nuu moni lona.
2. E! le lagi e lou Faaola o i ai,  
Le manuia lona  
E! le lagi e lou Faaola o i ai  
Lou nuu moni lona  
  
Alu ia, alu ia, i le nuu paia  
Alu ai, alu i le nuu paia  
A valaauina alu loa  
E nofo faatasi ai.

E faapea foi le agaga o le pese 315 i le IPI na fatuina e Folora H. Kasielu, o lona autu e faapea: "Aua na ia faatali atu i se aai... o lona mataisau ma le tufuga o le Atua lea." Eperu 11:10, O le pese lenei:

- |  |  |
|--|--|
| 1. Ua ou aumau iinei<br>O luga lou nuu<br>Leaga lalo nei<br>O luga lou nuu<br>O i lalo nei tiga<br>Ma puapuaga<br>O i luga lou Tama<br>O luga o lou nuu<br>O i lalo nei tiga<br>Ma puapuaga<br>O i luga lou Tama<br>O luga lou nuu | 2. E ui ina afa<br>O luga lou nuu<br>E tea ai mea tiga<br>O luga lou nuu<br>E taunuu atu ai<br>E tuanai uma ai<br>O mea e lutia ai<br>O luga o lou nuu<br>A taunuu atu ai<br>E tuanai uma ai<br>O mea e lutia ai<br>O luga lou nuu |
|--|--|

3. E mau ai ma Iesu  
O luga lou nuu  
E mapu filemu  
O luga lou nuu  
E tau fai faafetai  
Latou ua aofia ai  
Ma ou faatasi ai  
O luga o lou nuu  
E tau fai faafetai  
Latou ua aofia ai  
Ma ou faatasi ai  
O luga lou nuu



O le nuu moni lava le lagi, po o le lagi o le nuu moni, aua o loo i ai le Tama o loo faatali mai ai e talia le gasolosolo atu o lana fanau. O le nuu moni lava le aai, le aai ua saunia e le Faaola mo e ua faatuatua ma talitonu i le Toetu Manumalo o Iesu Keriso i le oti ma le tuugamau. Fai mai le Aposetolo o Paulo i le Ekalesia i Filipi, "A'o lo tatou nuu moni ua i le lagi lea, o loo faatalitali mai ai i tatou e le Faaola, o le Alii o Iesu Keriso, na te liua o tatou nei tino faatauvaa ia faatatau i lona tino mamalu." Efeso 2:19, "O lenei, e le toe tagata ese outou, poo e ua aumau, a ua nuu faatasi ma le au paia o le aiga foi o le Atua."

#### O LE FAATUATUA, O LE ALA LEA I LE NUU MONI

O le tusi i le 'au Eperu (Eperu 11) o loo i ai le lisi o le 'au faatuatua poo latou ua taua o le 'au paia o e ua aloaia o latou faatuatua i le lagi poo le nuu moni. I latou ia fai mai ua oti, ao loo tautala mai pea o latou faatuatua, e pei o Apelu, Enoka, Noa, Aperaamo, Sara, Mose ma nisi lava e toatele.

O i latou ia ua iloga o latou faatuatua ona o le faamaoni, amio-Atua, amiotonu, savavali faatasi ma le Atua, usiusita'i, faamalosi ma onosa'i i mea tiga. O i latou ia ua faatino le faatuatua, ole faalagolago lea i mea ua faamoemoe i ai, ma le mautinoa lea o mea e le o vaai.

O le Kerisiano faatuatua, o le tagata lea e agai pea i luma ma faamoemoe pea i le iuga, e mautinoa lelei e taunuu atu i le Atua i le nuu moni.

Ua auina mai e le Atua lona Alo o Iesu Keriso na te saunia i tatou i lea faamoemoe e tasi i le nuu moni. Na Ia faaalua foi, o le faatuatua lava le ala e taunuu lelei ai i le nuu moni. Na Ia fetalai ia Mareta, "O au nei le Toetu ma le Ola, o le faatuatua mai ia te au, e ui lava ina oti ae ola lava ia". O tagata ola uma o e faatuatua mai ia te au, e le oti lava e oo i le faavavau. Ioane 11:25-26.

Na fetalai Iesu i ona soo ma faamafanafana atu, "Aua le atuavale o outou loto; ia outou faatuatua i le Atua, ia faatuatua mai foi ia te au. E tele mea e nonofo ai i le maota o lou Tama, ana leai, po ua ou fai atu ia te outou, ou te alu e sauni se mea e nonofo ai outou." Ioane 14:1-2.

Afai e fesili mai se tasi i le fai pepa, Pe faapefea ona ou saili atu i le nuu moni? O la'u tali atu:

1. Ia saunia lou faatuatua ina ia faamaoni
2. Ia fai lelei au galuega ma ou ola usiusitai
3. Ia ou faia le finagalo o le Atua ma le amiotonu
4. Ia ou alofa atu i nisi tagata e pei ona ou alofa lava au ia te au
5. Ia ou onosai e fetai ai ma mea tiga
6. Ia avea le lagi e fai ma ou nuu moni ae le o le lalolagi.

#### IA MANUIA LE MAFUTAGA A LE MATAGALUEGA

*Saunia: Toma Vavae Toma FS  
Solosolo*



## O LE LOTU I SAANAPU

(O LE FAAAUAUGA)

### O LE VAELUAINA O LE EKALLESIA I AULOTU E LUA SAANAPU-TAI MA SAANAPU-UTA.

#### UPU TOMUA:

Ao lei oo atu se faamatalaga i le tulaga ua i ai le Galuega i saanapu, e ao pea ona fai sina tala i le tulaga ma le mafuaaga ua lua ai malumalu tapuai o Saanapu. O le afuafua mai o le Lotu i Saanapu sa amata mai lava i le aai, o le nofoaga lea o loo i le talafatai i le sami. O le amataga lena o le nuu, atoa ai foi ma le Lotu e pei ona taua i luga, peitai ua le tumau le soifuaaga o tagata i se taga e tasi ona ua tele suiga ua soifua ma ola ai Samoa. Ua fausia auala taavale ma ua faaoga le tele o masini faaonaponei, ma o le mafuaga maumaututu lea ua tuua ai e le toatele o le nuu ia le aai, ae ua fausia nofoaga e taulalata i ala taavale.

O le taulotoaiga o le 1950 na amata ai ona gasolosolo mai le tele o aiga ma aumau i le ala taavale, po o le vao e pei ona silafia ai e le toatele o le nuu i na aso. Peiseai ua fai lena faiga ma mafuaaga ua agai ai lava ina toatele atu i latou ua tuua le aai, ma faasolo ai loa ina tupu ae se lagona, ua tatau ma onomea ona fai se isi fale i le vao, e tapuai ai le toatele o tagata ua aumau ma nonofo ai.

O lenei lagona sa le faigofie ona faataunuaina, aua o se mataupu e maaleale tele i le va o aiga ma matai, aemaise o le saofaiga mamalu i alii ma faipule o le nuu ma le Faifeau i na ona aso. Peitai o le autu o se finagalo sa mafua ai lenei lagona, ona ua vaai ma le alofa i le toatele o le nuu ua nonofo i uta, ona ua matauina le le mafai ona auai i tapuaiga i aso Sa ona ua taumamao le aai, ma ua faapena ona aafia ai foi ma aoga Faifeau a le fanau i afiafi. O ona po ia o loo

i ai le faleaoga i tai i le aai, ma o se tulaga faigata tele le tuua o le aoga a nai fanau i le aoauli foi i aiga ona toe o mai lea i le aai i le aoga afiafi a le Faifeau.

E le gata i lea a ua vaia foi ma le popole le fetuleni mai o mau lotu eseese, ma o se avanoa lea e ono mafai ai ona tafe atu i ai i tagata o lenei nuu. Peitai o le tulaga faigata oloo fefulisai faalaaui mamafa i le tofa ma le fautuaga i alii ma faipule; Pe le o le faitotoa ea lenei ua latou tatala e vaelua ai foi ma le nuu i le lumanai?

O le saunoaga mai le Afioga ia Anapu Alii Anapu Solofa i le feiloaiga a le nuu sa talanoaina ai le mataupu e uiga i le faia o se isi lotu i uta, sa matua faia ma le faateete ma le faautauta, aua o lenei mataupu ua tulai mai, ua aafia ai le Faavae ma ua foliga mai ai ua peiseai ua vaeluaina le nuu. O le mea moni lava sa faigata ai le mataupu ona sa tetee le Au Matutua i se isi Lotu e faia i uta, ma o le mafuaga lena o le faigata o le mataupu peitai ua toatele foi i latou ua naunau lava ina ia faatu se isi falesa i uta. Ma o le tali na aumai i lena aso na faaalii lava i lea taeao ina ua potopoto le nuu atoa i le maota o Leaana Satini, ma sa tulai mai ai loa se vaaiga matautia i lea taimi ao loo alo le nuu i le malu taeao. O lenei vaaiga o se mea moni lava o loo taumafai pea le Afioga i le alii Sao e tau saili lona uiga moni. "Ao faasolo mai le malu taeao i le maota, sa lelei mea uma; peitai o le taimi lava a o loo faasolo mai le tipoti o loo liligi mai ai le suati, na vaaia ai e le maota atoa le vaeluaina o le ipu ti a Anapu i ni vaega se lua ao loo ligiina lana malu taeao.

Na matua nona atoa le maota ma ua leai se tasi e toe lagona se leo, ua fevaai soo le saofaiga i matai ma le nuu ua potopoto ma le le mautonu i lenei vaaiga ua tulai mai, ma ua tuufesili pe sea le uiga o lenei ipu ua vaeluaina.

A'o alaala pea le nuu ma le ofo tele i lenei vaiga faaperofeta o loo tulai mai, sa malepe le sao ma suia lagona uma o le nuu sa i le maota i lea taeao ina ua saunoa mai Mati Luaitaua, o le a fai la tatou tatalo i le Atua. Sa saunoa loa Anapu ina ua tuutau saunoaga ma fetalaiga o lenei aso i se faaiuga e faapea. "Ua talia le mataupu e pei ona talosaga mai ai Tamalii ma Failauga o le nuu o loo aumau i uta, peitai o le a fai tau o se isi falelotu ae o le a tasi pea le Faifeau e tausia uta ma tai," O le iuga ua faia i lea lava aso o le tausia lea o le filemu ma faamalieina le isi vaega tootele o le nuu ua nonofo i uta. O suafa nei o le Saofaiga mamalu i le Afioaga o Saanapu i na ona aso; O le Afioaga ia Anapu Aialii Anapu Solofa, Mulitalo Iuma, Leaana Utosega, Mati Luaitaua, Tafafunai Sinapati, Seve Ailima, Lalau, Tuigamala Ivala, Tugaleava Faatiuga, Lauvi Vela, Lesa Paulia.

#### **UA LUA MALUMALU TAPUAI O LE NUU.**

O le tausaga e 1980 na ae ai loa se tofa i le Afioaga ia Anapu ma le Toalima, ma le Maupu o le Tuiaana, faapea se faautautaga ia Tuigaleava ma le Falelotu, ina ia faamautu loa ma faia se isi fale tapuai i le ala taavale poo uta. O le iuga lenei o le fonolea sa potopoto uma ai le nuu i le maota o Leaana Satini e pei ona faamatalaina i luga.

Ua alu le savali i le Faifeau o Filipo Onesemo ma ua faailoa i ai le faamoemoe ua i ai le nuu, ma faailoa i ai o le a fai le isi fale tapuai i uta, o le mafuaga na faamamafaina i le savali: Ua vaai ma le alofa le nuu i nisi o alo ma fanau ua le o i sauniga lotu ona o le tau mamao, aemaise ai o fanau i le aoga a le faifeau i afiafi.

#### **Amataga O le Lotu i Saanapu-Uta:**

O le taulotoaiga o le tausaga e 1981 sa fausia ai loale uluai malumalu i uta i le ala taavale ma faaulufaleina ai lava i lea lava tausaga. Peitai o le aso lava lea na

faafofoga ai le nuu atoa i le saunoaga mai le Taitaifono o le Ekalesia aoao, le Susuga ia Tulafono ma faailoa mai ai le Faavae o le Ekalesia, e le mafai ona lua ni falesa ae tasi le Faifeau. O lona uiga e tatau lava ona saili se Faifeau mo le falesa fou ua i ai nei. O le tausaga e 1982 na amia ai loa le uluai Faifeau e tausia le Galuega i uta. Ma o le suafa o lenei Faifeau o Lomiga ma Lepeti Matafeo. O Lomiga sa amia e le nuu mai Asaga i Savaii, ao lona Falelotu e mai le nuu o Saleimoa. Ma o le tausaga lava lea na faaigoa ai loa lenei aulotu ia Saanapu-Uta.

O le aso 29 o Aukuso 1993 na tatala ai le Feagaiga a le aulotu ma Lomiga ina ua tutupu mai ni feseeseaiga i le Faifeau ma le aulotu. O le tau faaiuga o le tausaga e 1993, sa toe feiloai ai le aulotu i Saanapu Uta ma fai ai loa le latou filifiliga mo se faifeau e tausia le aulotu ua tuufua. Ma o le iuga o lea filifiliga na manumalo ai le Aoao o loo tau faaiuina ona aso i Malua i lea lava tausaga, ma o le igoa o lenei Aoao o Lealofi Oto ma lona Falelotu o Taei. Sa alu le savali a le aulotu i Malua ma ua talia e le Aoao le manao atu o le Aulotu. O Lealofi na aami e le aulotu mai le nuu o Vaovai, Falealili. O le nuu o le Faifeau lenei o Vailuutai a o lona Falelotu o Vaovai. Sa osia le Feagaiga a Lealofi ma Saanapu-Uta ia Aperila 23 1994. Ma o le Susuga ia Lealofi Oto na faaofia mai le Sa o lenei Aulotu ia Aperila 23 1994. Ma o le Susuga ia Lealofi Oto na faaofia mai le Sa o lenei Aulotu malosi ma le tootele i lenei Meleniuma Fou, TA 2000.

#### **O LE LÖTU I SAANAPU-TAI**

O le mea moni lava e le mafai ona natia, e tootele foi nisi o le nuu e lei taliaina le vaeluaina o le Lotu i uta ma tai, E le faigofie ona ua peiseai ua vavae ese lenei itutino o le mafutaga mai le olaga sa masani ai. Peitai sa faamautu pea le lua o Falesa o le nuu, ma ua faasaga foi i latou o loo nonofo i le Aai e faaauau le

Galuega e pei ona sau ai i aso ua mavae.

O le tausaga e 1982 na tatala ai le Feagaiga a Filipino ma Emi ma Saanapu Tai, ma foi atu ai i laua i o la aiga. O le Aoa Fesoasoani o Aliimuamua Iese Mulitalo sa tausia le Galuega seia oo ina maua le Faifeau mo Saanapu Tai.

O le tausaga 1983 sa filifilia ai loa e le Aulotu i Saanapu-Tai ia le Faifeau o Fuifatu ma Aaone Enosa, e tausia le Galuega aua ua lua tausaga o tuufua. Sa alu le amiga o Enosa i Saleimoa, ma sa Osia le Feagaiga ma Saanapu-Tai i le aso 24 o Tesema 1983. Sa sologa lelei le galuega a lenei Faifeau, ma ua faaiuina le soifua galue o lenei auauna ia Tesema 1992, ina ua aulia tausaga e 70 e Penisione ai e tusa ma le iuga a le Ekalesia aoao.

O le amataga o le tausaga 1993, na ae ai se finagalo o le Aulotu i Saanapu-tai ua tataua ona sailia so latou Faifeau e tausia le Galuega. Sa fono le Aulotu ma ua faia ai loa le latou palota faalilolilo, ma ua tulai mai ai le manumalo o le Aoa faatoa faaiuina lona taumafai mai le Kolisi Faafaifeau i Malua. O le igoa o le Aoa o Iakina Alefaio ma Matagitau. O le nuu o le Faifeau o Pata i Falelatai ma Elisefou ao lona faletua o Aufaga i Lepa. Sa alu le amiga o Iakina ma Matagitau i lo la nuu o Elise Fou, Pulega a Faleata i sisifo, ao le Matagaluega a Apia i Ssisifo. O le aso 2 o Aperila 1993 na Osia ai le Feagaiga a le Faifeau ma Saanapu-Tai, ma o le Faifeau lava lenei sa momoliina le viiga i le Atua Mamana, ina ua aulia mai e lenei Aulotu le TA 2000 i le manuia ma le soifua lelei.

#### **LUITAUINA O LE FAAVAE O LE LOTU**

E lei faigofie ona asaina mai e tagatanuu o Saanapu le Faavae o le Lotu ua maea ona faataatia mai e ona Tuua ma Matua ua fai i lagi le tuligasia. O le Faavae e pei ona laulaututu uma ai le nuu ia Tesema 1841,

ma tuuina atu lenei laueleele ma ona tagata uma ina ia tapuai i le Atua o lenei tapuaiga e oo i le faavavau. Peitai ua tele suiga ua sosolomaifaataifanae ma ua avaga i ai loto o nisi o tamafanau o le nuu.

Aua o le tausaga e 1982 na matua feagai ai le nuu nei ma se ao pogisa ina ua faatuina i le maota o Tuigamala Liuliu se isi faletapu, ma ua salalau le tala o le Lotu Assembly lea ua faatuina i laueleele o Latatuli o le tua o Siulepa.

Sa lei faigofie lenei mea ua tulai mai aua o le Faavae o le nuu i Tapuaiga, lea ua lepeti ma sosofa e nisi o alo ma fanau o le nuu. Sa feiloai le pulega mamalu i Alii ma Faipule o le nuu ma ua tasi ai le tofa ma le moe, o le mataupu o le a tuuina atu i le faamasinoga e aumaia ai le iuga.

Talofa, ua le ma nofonofo le matua alofa ma le tagata e naunau i le manuia auiluma mo tupulaga o le nuu mo taeao, aua ua faaauau pea le faamasinoga i Mulinuu ma ua aumai le tali ma le iuga i lena aso. Ia tumau Saanapu i lona Faavae, e tasi pe le Tapuaiga e lolotu uma ai tagata e oo i le Faavavau.

Talu ai ona o le naunau pea o Alo ma Fanau o Saanapu, aemaise o le pulega i alii ma Faipule o le nuu e saga faamalosi pea lenei mau na mafua ai loa ona toe faia le isi faasalalauga i le Nusipepa o le Savali, Samoa Observer, ma isi Nusipepa uma i lenei vaitau ina ia faasalalauina le Tapu a Saanapu. Sa fofoga foi i le TV ma Leitio 2AP FM Magic, Laufou "O lenei faasalalauga o loo matua faasaina ai ona toe fausia se isi falelotu i totonu o le nuu seia vagana ai le EFKS. Ua matua Tapu foi ona toe faia ni talaiga Faa-Molimau a Ieova, Bahai, Musalemi, Faa-Penetekoso, YFC, Faa-Emanuelu, Faapatipati (Assembly of God/ Aoaoga Faa-Tusi Paia, poo ni faiga FaaEvagelia, poo soo se Talaiga Fou e toe ulufia pe afea Maota ma

Laoa o lenei nuu o Saanapu i soo se aso lava. Ua matua faasaina foi soo se taavale tau talaiga ona toe afea le aai o lenei nuu o Saanapu.”

O nei faasalalauga sa faia i le aso 30 o Novema 1998, ma ina ua tuanai masina e tolu sa leai se tasi e faalavelave, ma ua faamamaluina loa i lalo o le Tulafono o Fanua ma Suafa o le Malo Tutoatasi o Samoa.

#### **Ma o le Faaiuga lenei o loo faamauina:**

1. Ua talia le talosaga a le Resitara mole faamaonia o le faasalalauga o le Tapu ma le Faavae a Alii ma Faipule o Saanapu.
2. O lea ua famaonia ai e le Faamasinoga lea faasalalauga a Alii ma Faipule o Saanapu i le Savali o le aso 30 o Novema 1998, e tusa o le Tapu ma Faavae o le nuu i mataupu tau-Lotu poo talaiga eseese.

#### **MOLIMAU MAI NISI O LE NUU:**

E tele ma lasi le mau faamatalaga mai tamafanau o Saanapu e manatua ai pea nisi o tulaga mamalu ma le maopoopo o le nuu i aso ua mavae, peitai o le tausia o le faaloalo ma le ava fatafata i le va o le nuu ma le Faifeau, o se tasi lenei o mea tausii e faapelepele i ai le tele o nuu o Samoa, ma o se tasi foi lenei o tu ma aga e le mafai ona faaagaloina e auga-tupulaga o lenei nuu o Saanapu, pe a fai e toe to manatu i futia ua sola ma le gasologa mai o le Tala Lelei.

Sa faamatalaina e se tasi o tama matua o lenei nuu se mea na tupu i aso ua mavae e manatu o ia, o se tasi lenei o pine faamau ole ave o le faamuamua a tagata o Saanapu i le Galuga a le Atua. E soisoi lava Afoa Tapunuu Same ma faamatala le faiga malaga a le Faailu pu a Asau sa talimalo ai Saanapu i aso ua mavae, ua oo i le po ona alaala lea i ai o Taeafa ma le Aualuma, o aso foi ia o loo fai le sa i le 10pm. Saunoa Afoa, e le o iloa e si ona tama ua uma ona ta le logo a le

faifeau o Filipino o le sa i le 10pm, ua mua foi ona alo si ona tama o Tariu i le fuataimiina o le pese a le Aualuma, ma e fetau lava le faapalasi ifo i lalo o si ona tama i le taimiina o le pese ae faalava ai loa ma le amo fuafua a le Faifeau i le papatua. O le tala a Afoa e tupu mai lenei vaaiga a ua matutua ma faitoalua le fanau a Tariu. O le mafuaga o le ata o Afoa ona o le oso i fafo a si ona tama ma le fale ma faataalise ese.

O le fesili a Afoa ia te au “Mata o toe i ai se mamalu faapea i nei ona aso?” E leai sau tali pau lau talosaga ia Afoa, pe mafai ona ou tusia lenei tala ona o loo aafia ai si ona tuua. O le tali na aumai, “Ou te manao e te faaogaina lenei tala ina ia silafia ma manatua ai le loto maulalo o Tariu i le Galuga a le Atua.

#### **UPU FAAIU:**

E fia faamauina lau faafetai tele i le Afioga ia Anapu Aialii, Leaana Faananalo, Leaana Fesilafai, Mati Talai, Afoa Tapunuu Same, Mati Talutalufou ma le toatele o matai Saanapu ua le mafai ona taua o latou suafa i lenei tusitusiga, o i latou sa tofu sao mo le tau faamaopoopoina o lenei tala taua ma le aoga. O le vaega muamua o le tala e pei ona amata mai i le Amataga o le Lotu, 1841 seia oo mai i ona po o Filipino Onesemo i le 1957, ole tala lea sa tusia e le Susuga i le Faifeau o Soloi Williams sa faiaoga i Malua i le 1955-57. Sa tuua Malua e lenei Auauna aoga ina ua valaauina e galue faa-faifeau i Fitiuta i Manua. O le tala sa ia tusia o lana meaalofo lea mo le Nuu o Saanapu i le Faaulufalega o le Falesa o loo faaogaina nei e Saanapu Tai, ma o lea faaulufalega sa faia i le tausaga e 1957 ma ua faaigoaina lenei Malumalu o le “Ana e Sili ona Paia.”

O le agaga autu o lenei tusitusiga ina ia fai ma taiala aoga mo tupulaga o lenei nuu o Saanapu i le lumanai. Ua ou manatu e tusia lenei tala i mea na tutupu o le Lotu i Saanapu, a o loo soifua mai le toatele o tama

ma tina sa molimauna ma faafofoga ma silasila i nei suiga fou ma le taua ua tutupu mai.

Fai mai le talitonuga o nisi o tagata suesue i le Tusi Paia, o le tusi o Mareko o loo tusia i se faasologa e le o faataatia lelei, o le mafuaga ona ua naunau tele le tusitala e faamaopoopo ma tusia vave nei mea aoga, ona ua tauau lava ina tuu tala moni ae ua faasolo ina tele tala le moni ma talà faaopoopo, ona ua tauau ina mou atu i latou na mafuta ma soifua faatasi ma Iesu.

E ioe ma talitonu le Tusitala o lenei pepa, o suiga ua faia e Alii ma Faipule o Saanapu i le faia o Falesa e lua e tapuai ai le nuu, o se faiga lelei lea ma le alofa i alo ma fanau o le lumanai. E ui lava ina faigata i le aso na afuafua ai lenei faamoemoe, ae leai se tasi e faameo aua e le faigofie ona fai se suiga faapea ona ua mafana le mafutaga. E tumau lava faavae ae fesuisui ai faiga mai lea aso ma lea ituaso. E ui lava ina lua falesa lua foi Aulotu, ao le mea sili ma le taua, o loo tumau pea le nuu i le tasi o le Tapuagia poo ole Lotu e pei ona amata mai ai i le TA 1841, ma o lea Lotu o le LMS e pei ona uluai amata mai ai, a o lenei ua suia lona igoa i le EFKS. (Ekalesia Faapotopotoga Kerisiano Samoa).

Ua tatala foi le avanoa ma ua tuuina atu le saolotoga mo i latou ua liliu ese mai lenei Tapuaiga e lolotu tausavali ai i lotu ua liliu i ai. Ao le faavae i le tasi o le Tapuaiga o loo tumau lava mai le amataga e oo mai i le TA 2000.

O lenei tala ua toe tusia ma teuteuina e Rev Iakina Alefaio mo le nuu ma le Lotu i Saanapu. E faamauna ai lau faafetai ia Anapu ma le Toalima, Maupu o le Tuiaana, Tuigaleava ma le Faletolu ma Aiga e Lua, ona o le taofi mamalu. (Soifua).

## O LE MANA O LE ALOFA

Sei tatou fesili ifo nei i lenei fesili i lenei aso. O le ala ea o le alofa o le ala sili lea e tatau ona tatou ola ai? Afai foi ou te filifilia nisi ua lauiloa tele i le Feagaiga Fou, ou te fia filifilia i latou nei: o Iesu, Setefano, Paulo ma Ioane. Aisea ua ou filifilia ai na o lenei toa fa o i latou? Aua o i latou ia, o i latou uma o matai faamatua o lenei lava matupu o le alofa.

E ui lava ina ua malii Iesu, ae peitai, i lea lava ituaso na to ai Lana manava, na maina mai ai i Ona laufofoga nei upu, “Lou tama e, ia e faamagaloina atu ia te i latou; aua ua latou le iloa le mea ua latou faia.” (Luka 23:34). E faapea foi le mea na faia e Setefano. I le tusi o Galuega 7:60, ua taua mai ai o le ituaso na fetogi ai e fili o Setefano o ia i maa, o le ituaso lava lea na alaga ai o ia ma le leo tele ma tootuli ifo ma ua faapea atu, “Le Alii e, aua e te tuuina atu lenei agasala ia te i latou. Ua uma atu lea upu ona moe ai lea o ia.” Na i ai foi lea agaga ia Paulo, e pei ona faaalua mai i ana upu i le 2 Timoteo 4:16, “O lau uluai faamatalaga tetee, e le i faatasi mai ai se tasi ia te au, a ua lafoai mai e tagata uma ia te au; aua nei tauina atu ia te i latou.”

Ma, o nisi o toe upu a le aposetolo o Ioane ua faapea mai, i le 1 Ioane 3:16, “O le mea lava lenei ua tatou iloa ai le alofa, ina ua tuuina atu e ia o lona lava soifua e sui ai i tatou; e tatau foi ona tatou tuuina atu lo tatou ola e sui ai le au uso. E matua manino lelei i ia upu a o faaalua manino mai i o latou laufofoga, le ofoofogia

ma le uiga ese ma le malosi tele o le MANA O LE ALOFA

.O ia foi ata e fa mai le Feagaiga Fou, ua manino atili ai ia i tatou, o le taimi tonu lava lea ua pati ma po ai le fili mo le tualugaina o ona manumalo valea i ana auala sese e tau ai i isi lo latou uiga tau ma sui, o le itu aso tonu foi lea e lagona manino ai le malie o le leo o le tatalo alofa faamagalo atu a le ALOFA. O le taimi tonu lava lea ua malie ai lava le faalogo atu i le ofoofogia uiga ese o le MANA O LE ALOFA.

Ou te manatua foi iine ile tasi tala malie e faamaonia ai atili le ofoofogia uiga ese O LE MANA O LE ALOFA. O le tala lea i se tasi alii Amerika sa galue faamisionare i Saina i aso o vevesi tele taua o le lalolagi. Na alu ane se tasi alii ofisa maualuga Iapani i se tasi aso ua fai atu i le alii misionare Amerika lea, e tuuina atu ia te ia o ki o le Iunivesite Amerika sa i ai iina, ia te ia. Sa le talia e le misionare le manao o le alii ofisa Iapani. Ona fai atu lea o le alii ofisa Iapani, Afai e le tuuina atu ia te ia o ki o le Iunivesite o le a saunia e ia se auala e fasiotia ai o ia. Peitai, e le i talia lava e le alii misionare le manao o le alii ofisa Iapani. O le mea lea ua faatonuina ai loa e le alii ofisa Iapani o ni fitafita Iapani se toatolu e o ane ma ni a latou fana e tafanaina ai le alii misionare ina ia oti ai.

I le, ua o ane loa ia fitafita e toatolu Iapani ma a latou fana, ua tutu lelei i luma o le alii misionare ma faata a latou fana e fanaina ai le


alii misionare. O le taimi lava na sisii ai i luga lima o fitafita Iapani e tafanaina le alii misionare, o le taimi tonu foi lea na tu lelei ai i luga e alii misionare, ua ata faamaela leo tele leo malie ma le leo alofa. O le mea ua tupu mai, ua tetei fitafita ma ua ofo i le ata-faamaela-leo malie alofa o le alii misionare. Ona tuu loa lea i lalo o a latou fana, ua leai se mea e faia. E peiseai ua maluia i latou i le malie tele o le leo ata-faamaela alofa a le misionare. O le mea moni, o le mana lea o le alofa ua suia ai lo latou ita i le filemu.

Fai mai le molimau a se tasi tagata sa vaavaai lelei i lea mea na tupu, e oo lava i le alii ofisa maualuga Iapani lea na mafua ai lea faalavelave, e le i toe mafai e ia ona faia se isi faatonuga i ana fitafita. Ua tea malie ese foi lona ita ma lona le malie i le alii misionare. Ua maluia o ia i le mana o le alofa. Mulimuli ane, ua saunia e le alii misionare se taumafataga lelei ua taumafa ai le alii ofisa Iapani ma ana fitafita Iapani, ona o ai lea o i latou e fai a latou feau e masani ai.

O le upu moni lava lea ua faaalua i lenei tala: E MANUMALO PEA LE ALOFA. E LEAI SE ISI MANA E SILI ATU I LE MANA O LE ALOFA.

V.T.





**SAAFIAFIGA MO LE TAMA PELEINA -Rev.  
Kuata Pue (FS)**

Aue! Ua maliliu toa! Ua fai i lagi le tuligasia! Ierusalem e, afai e galo oe i a te au, ia galo lava i lcu lima taumatau, afai ou te le manatua oe ia pipii ae lou laulaufaiga i lou gutu. O Kuata, o se lupe faalele mai le Atu Toelua. Na soifua mai o ia i le aso 6 Mati 1937 i Fakaofu. Toelau i le vaitau o galulue ai le faifeau o Kaio ma Anà Afoa i Fakaofu. O ona matua o Pue Amueli ma Tapaue Lameko.



O lona olaga aoaoina sa aoga i le Aoga a le Faifeau ma le Aoga Tulaga lua i Fakaofu lava. Ona auina mai lea e le faifeau o Kaio Afoa FS e aoga i Vaisigano, Maluafou, Kolisi i Leulumoega Fou, seia oo atu lava i le Kolisi i Malua, ma faaiuina ai i le tausaga 1968.

Sa faaipoipo atu o ia ia Timena Tomane, mai le nuu o Samatau, ao faifeau ai Tavita Leasuasu (FT) ma Folole. Sa maua se fanau e toatolu tasi le tama ae lua teine.

Sa faaipoipo atu o ia ia Timena Tomane, mai le nuu o Samatau, ao faifeau ai Tavita Leasuasu (FT) ma Folole. Sa la maua se fanau e toatolu tasi le tama ae lua teine.

Sa faauuina i laua i le Fono Tele sa faia i Tutuila i le 1970. Ma o le tausaga lava lea na tuuvaa atu ai mo lo la valaauina i Atafu i Toelau i le masina o Oketopa. Ona la galulue ai lea mo le 10 tausaga seia oo mai ia Oketopa o le 1981, ona malolo mai ai lea i Vaivasetai. Ona toe valaauina lea mo le galuega i Uafato. Fagaloa i le 30 Tesema, 1981 seia oo i le masina o Iulai 1990. Ona malolo mai ai lea i lo la fanua i Vaivase-Uta. Ona

toe valaauina ai lea mo le galuega i Satitua. Aleipata i le 4/1/1991 seia oo lava ina valaauina mai o ia e lona Matai i le aso 15/3/2000 o loo faapea lava ona fai. Sa i ai Komiti o le Ekalesia, sa galue ai pei o le Komiti Au Leoleo. O se tama tausafia loto galuega, le filifili nuu. O lana mau - "O le nuu lava e muamua mai le valaau, o le valaau lena a le Atua."

Talofa e, o ia lava o le toa o le Talalelei. O se tagata e fia fai mea lelei mo le galuega a le Atua. O lona sauniga i le Falemaliu sa taitaia lava e le Susuga i le Tocaina o le Pulega a Aleipata. Sa molimau ai foi le Susuga Toese Peleti FT (la te suega faatasi i Malua). "O Kuata o se tagata loto maualalo ma agama'u."

Ona molimoli atu lea o lona tino maliu i lana Ekalesia pele i Satitua. Ona faia ai lea o le sauniga. Taitai: le Susuga Pisa Isaia FT. Tatalo: Timoteo Usu FS. Tusi Paia: Foma'i i faiaalii ae Lauga le Susuga Oka Fauolo FS. Sui Taitaifono o le EFKS. Ona molimoli atu ai lea o lona tino maliu i le Maota o le Galuega.


O ona toe sauniga: sa Taitai: e le Susuga i le Tocaina Pisa Isaia FT. Lauga: Sulufaiga Samasoni FT, Taitaifono o le EFKS: Tatalo: Popo sua FT. Molimau: Eteuati Pasia FT. E le gata i lea ae sa faatasi atu le paia ma le mamalu eseese o le taitaifono. Sui Taitaifono o le Ekalesia. Susuga i Tocaina & Faletua le Aufaigaluega Paia a le Atua ma Faletua. Susuga i le Pule ma le Kolisi Faafaifeau i Malua, aemaise lava lana vasega i Malua (1965-1968).

E avea ai foi lena avanoa e momoli atu ai le faafetai tele i le paia ma le mamalu o le Ekalesia tagata alolofa sa auai atu i toe sauniga o Kuata. Pau le upu e mafai: FAAFETAI, FAAFETAI, FAAFETAI, TELE LAVA, lo outou aao mafola ma le alofa tulai "Le Auauna lelei e, ma le faamaoni, ulufale maia i le fiafia o lou Alii.

Soifua

Timena K. Pue ma le fanau





# Fale Tusi Ma le Fale Lomitusi



PA'U! PA'U! PA'U! MAOA'E

MO LE LOTU TAMAITI

- Maua Peleue o Tamaiti
- Maua Ofu Papae o Teineiti
- Maua ofu lanu mo le Toonai.

\* *A leai sau tauloto, maua i le IA MALAMALAMA BOOK-SHOP lau Tauloto.*

*Afio mai i le Pa'u Maoae o le Lotu Tamaiti 2000*

KOMITI O LE FALETUSI

